

11/03/2001

Tokoh wanita setuju had umur Puteri Umno

Maizura Ismail; Nor Afzan Mohamad Yusof

KUALA LUMPUR: Beberapa tokoh wanita Umno bersetuju dengan keputusan Majlis Tertinggi parti menetapkan had umur jawatan Ketua Puteri Umno kepada 40 tahun, manakala ahlinya berusia kurang daripada 35 tahun.

Mereka menyifatkan had umur itu wajar kerana Pemuda Umno juga menetapkan ketuanya boleh melebihi usia 40 tahun sedangkan ahlinya di bawah 40 tahun.

Naib Ketua Pergerakan Wanita Umno, Datuk Shahrizat Abdul Jalil, berkata keputusan itu tidak mengejutkan malah menyifatkan ia adalah had umur yang sesuai.

"Saya pasti keputusan penetapan had umur sudah lama dibincangkan dan saya menyambut baik keputusan itu. Apa yang penting adalah perjuangan Puteri Umno itu perlu jelas dan sejajar dengan kehendak Umno.

"Siapa yang menjadi Ketua Puteri Umno, masih menjadi tanda tanya," katanya yang juga Menteri Pembangunan Wanita dan Keluarga.

Pengerusi Tetap Wanita Umno, Tan Sri Aishah Ghani, bersetuju dengan keputusan penetapan had umur yang disifatkan tidak mendatangkan sebarang masalah asalkan perjuangan memantapkan Umno tetap unggul.

"Saya menerima apa saja keputusan yang ditetapkan itu. Soal umur tidak menjadi persoalan besar asalkan Puteri Umno tahu matlamat penubuhan serta bersama memperjuangkan Umno," katanya.

Ahli Majlis Tertinggi Umno (MT) yang juga pencetus penubuhan Pergerakan Puteri Umno, Azalina Othman, pula berkata beliau akur serta mengambil sikap tunggu dan lihat perkembangan seterusnya berikutan pengumuman penetapan umur jawatan ketua unit itu.

Ketika dihubungi semalam, beliau enggan mengulas lebih lanjut kerana keputusan menentukan pucuk pimpinan unit itu kini terletak dalam tangan pemimpin tertinggi Umno.

Bagaimanapun, beliau tidak puas hati dengan kenyataan bahawa MT masih belum berjaya mencari calon sesuai yang bakal mengetuai jawatankuasa penaja berkenaan.

"Saya tidak faham apa yang dimaksudkan dengan masih belum ada pemimpin bagi Puteri Umno. Keadaan ini meletakkan saya di tengah-tengah antara hendak memberi buah fikiran atau tidak," katanya.

Beliau berkata demikian ketika mengulas kenyataan Perdana Menteri, Datuk Seri Dr Mahathir Mohamad, yang mengumumkan keputusan MT memutuskan had umur bagi jawatan Ketua Puteri Umno ditetapkan kepada 40 tahun, manakala ahlinya berusia kurang daripada 35 tahun.

Akhbar semalam bagaimanapun melaporkan penentuan bagi jawatankuasa penaja dan ketua unit masih belum dibuat dan akan dilakukan oleh Jawatankuasa Pengurusan dan Disiplin Umno yang dipengerusikan Timbalan Presiden Umno, Datuk Seri Abdullah Ahmad Badawi.

Abdullah pada sidang akhbar selepas Mesyuarat Jawatankuasa Pengurusan Umno 22 Februari lalu berkata, ahli yang bakal dilantik dalam jawatankuasa penaja Puteri Umno akan mewakili semua negeri, tetapi sehingga kini MT masih belum menamakan atau mencari calon sesuai yang bakal mengetuai jawatankuasa itu.

(END)